

# 圣武记

圣武记

大非國家利又三桂子精忠諸弟皆宿衛京師諒無能爲變特允其請徙藩山海關外時三桂冀朝廷慰留如明沐英世守雲南故事及

命下愕然與其黨聚謀陰勒士馬禁遏郵傳惟許入不許出及侍郎哲可肯學士傳達禮至滇三桂陽拜詔而屢遷行期反謀益急諒中朝諸將無足當已者惟難於舉兵之名欲立明後以號召天下則緬甸之役無可自解欲行至中原據腹心始舉事復恐日久謀泄遂於十一月二十一日發兵反殺巡撫朱國治執按察使以下之不屈者移檄遠近自稱天下都招討兵馬大元帥以明年爲周元年蓄髮易衣冠旗幟皆白貴州巡撫曹申吉貴州提督李本深雲南提督張國柱皆從賊雲貴總督甘文焜在貴陽聞變欲拒守而督標兵皆不爲用疾馳至鎮遠爲賊黨所遮死之有郎中黨務禮薩穆哈在黔督理移藩舟馬疾馳十

二日至 關告變湖廣總督蔡毓榮亦奏至舉朝震動大學士索額圖  
請誅諸臣之建議撤藩者 上不許惟馳 詔止閩粵兩藩勿

撤先遣都統巴爾布等率滿洲精騎三千由荊州守常德 命都統

珠滿以兵三千由武昌赴守岳州 命都督尼雅翰赫業席布根特

穆占佟國瑤分馳西安漢中安慶兗州鄖楊汝寧南昌諸要地聽調遣

削吳三桂官爵宣示中外下其子應熊及家屬於獄 命順承郡王

勒爾錦爲寧南靖寇大將軍統師至荊州又以滇蜀接壤 命西安

將軍瓦爾喀率騎兵赴蜀而大學士莫洛經略陝西軍事三桂亦遣其

將王屏藩犯四川馬寶等出貴州湖南除夕陷澧州明年正月賊將龔

應麟夏國相張國柱軍至湖南提督桑額自澧州走夷陵巡撫虞震棄

長沙奔竄巴爾布碩岱珠滿等兵於二月初至荊州武昌畏賊勢不敢

進於是常德長沙岳澧衡二三月間先後陷賊且散布偽劄四出誘煽  
襄陽總兵楊嘉來以襄陽應賊廣西將軍孫延齡提督馬雄以桂林應  
賊四川巡撫羅森提督鄭蛟麟總兵譚洪吳之茂以四川應賊福建耿  
精忠聞之亦同時反數月而六省皆陷三桂以疏付哲爾肯傳達禮還  
奏而親赴常澧督戰驅土司苗獠助軍鋒伐黔楚山木造樓船巨艦鑄  
滇銅爲錢文曰利用轉川湖之粟以餉軍廣餌賊黨號召天下賊將吳  
應麒踞岳州於城外濬濠三重設陷坑鹿角以拒步騎於洞庭峽口橫  
立稍樁以拒舟艦而澧州石首華容松滋皆布重兵爲犄角我兵雲集  
荆襄武昌宜昌諸郡無敢渡江樓其鋒者察哈爾科爾沁諸蒙古各請  
出兵馬從征討賊 詔回收聽調又 命西洋人南懷仁多製輕  
便火礮俾越山渡水以利行軍之用西藏達賴喇嘛奏言三桂若窮蹙

乞降可宥其一死倘竟鴟張不若裂土罷兵

上嚴斥不許三桂

以荆楚大兵扼其前乃使其將分道一由長沙窺江西一由四川窺陝西其江西之賊入袁州陷萍鄉安福上高與耿逆之兵合陷三十餘城

上命貝勒尙善爲安遠靖寇大將軍助順承郡王分討岳州之

賊 命安親王岳樂爲定遠平寇大將軍出江西又以簡親王喇布

爲揚威大將軍統帥鎮江南以貝勒洞鄂爲定西大將軍與莫洛由陝攻蜀康親王傑書爲奉命大將軍貝子傅喇塔爲寧海將軍由浙討閩孫延齡則 命尙可喜及總督金光祖由粵東進兵討之且 諭岳

樂以湖南一隅四方羣寇所觀望今荊州兵未能渡江岳州城堅難驟進宜由袁州直取長沙長沙一破賊勢瓦解荊州大兵即可乘機進攻指揮甫定而是冬陝西又有王輔臣之變初西安將軍瓦爾喀等兵已

克復漢中進抵保寧在八月秋賊將王屏藩復出兵斷我餉運劫糧艘於  
略陽截陸運於棧道於是保寧之師退至廣元缺餉兩月總兵王懷忠  
標兵四千潰散提督王輔臣陰生異志遂唆其衆二千譟餉攻莫洛於  
寧羌戕之降附於三桂先是

上命莫洛統綠營步兵先行而貝

子洞鄂率滿騎繼進洞鄂遲延繞道致經略孤軍遇變及王輔臣所部  
兵逃散過半輔臣僅偕數百人走秦州洞鄂復不躡擊而徑回西安致  
輔臣得據平涼而漢中復陷於賊三桂聞之急給輔臣犒師銀二十萬  
又令蜀將王屏藩吳之茂由漢中出隴西援應徧布偽劄所在響應土  
寇羌番蠭起時荊州夷陵赴援之兵及保寧引回之兵盡集西安

詔分千人赴守蘭州千人赴守延安洞鄂及總督哈占皆留兵西安不  
遣於是十四年秦州蘭州鞏昌定邊靖邊臨洮慶陽綏德延安花馬池

相繼失輔臣自踞平涼使其黨分據各郡隴右皆陷於賊惟甘肅提督張勇總兵孫思克王進寶陳福斬使繳割故河西及陝西未全陷洞鄂督諸將復秦州進攻平涼張勇遣諸將復蘭延鞏諸郡自守鞏昌秦州以隔蜀賊隴賊相通之路

詔以張勇爲靖逆將軍便宜行事

命輔臣子齋

敕招撫輔臣雖具疏謝罪而負隅抗拒與洞鄂軍相

持一年不下又旁煽寧夏標兵殺提督陳福

上遣天津總兵趙

良棟自京疾馳赴寧夏是冬與安兵亦叛與漢中賊合十五年乃

命圖海爲定遠大將軍往莅西師貝子洞鄂以下咸受節制三桂方遣

王屏藩譚洪吳之茂等三路分犯秦隴欲與平涼賊合并令雲南土司

總兵陸道清率苗獮千人入平涼助守圖海至督諸將一戰大敗賊於

平涼城北奪其虎山墩斷賊餉道俯瞰城中以礮攻之輔臣懼遂率僞

巡撫總兵等降王屏藩吳之茂屢爲張勇王進寶所敗遁還漢中固原慶陽諸郡皆復

詔圖海留陝而征南將軍穆占率滿兵及平涼降兵移征湖南又以棧道運餉不易

敕諸將暫緩進蜀但守險要分

賊勢令大兵得專力湖南此十四五年西路之形勢也初三桂以王輔臣之變欲由秦蜀入犯親至松滋布賊船於虎渡口上游截荆岳大兵咽喉揚言將決荊州夾隄灌城潛分岳州賊衆踞彝陵東北之鎮荆山糾王會楊來嘉洪福掠穀城鄖陽均州南漳欲以通興安漢中之賊會是冬王輔臣反正圖海張勇四守要害安親王岳樂率兵復建昌廣信饒州

上命岳樂趨長沙而簡親王喇布移軍江西是時三桂以兵七萬據岳州澧州諸水口以拒荊州江北之師以兵七萬據長沙萍鄉醴陵以拒江西之師安親王乘三桂西上時由袁州攻賊使奇兵由

間道襲破其城遂由醴陵攻萍鄉斬賊萬餘夏國相棄城走遂進攻長沙湖南震動三桂既不得志於秦聞長沙急乃由松滋回軍自將援長沙屯隔江嶽麓山使胡國柱守城中馬寶王緒營城外掘重濠布鐵蒺藜列象陣盡調彝陵南漳諸賊合力拒守

上以賊并兵守長沙

其湖口各路守備必虛

命荆岳兵渡江急進於是勒爾錦敗賊於

公安之虎渡口

虎渡口澧水入江處也

使察尼敗賊於澧州之太平街尙善遣舟師

入洞庭克君山賊舟五十艘時賊下游兵少望風潰遁苟官兵長驅則

澧州常德湘陰迎刃立解可以夾攻長沙而諸軍遷延不進又不力扼

虎渡口致松滋上游賊舟救至勒爾錦卽棄太平街不守藉稱暑溽引

還荊州尙善舟師亦未能斷賊餉道江湖之險復爲賊據三桂復使賊

將高大節等

方略作高大節庭聞錄作高得持

出醴陵萍鄉陷吉安以斷安親王軍後路

簡親王頓兵南昌不援屢

詔趣之始赴軍高大節驍果善戰所將

選鋒四千以少擊衆我師敗挫嘗以百騎奔我軍於大覺寺斬將擐旗  
又以少兵奔大軍於螺子山簡親王將軍希爾根皆倉卒棄營走賊入  
壘縱飲飽掠而歸會賊將韓大任構之胡國柱大節怏怏死大任不敢  
出戰吉安遂爲我師所圍十六年春吉安糧且盡三桂遣馬寶王緒以  
兵九千來援大任疑不之信寶師至阻水城中寂然無一礮相應亦疑  
不敢進乃引還湖南喇布遣兵二萬追擊爲賊連敗夏四月城中賊宵  
遁皆步行渡河我師聞其鼓礮以爲劫營尙驚擾達旦不敢追擊於是  
大任復合土寇踞寧都樂安間乃

詔江西綠旗兵聽總督董衛國

調遣會閩粵王師數路告捷耿精忠尙之信先後反正大任走降於福  
建江西略定三桂乃使胡國柱馬寶攻尙之信於韶使吳世琮攻孫延

齡於桂林以圖兩粵其地皆與湖南相脣齒故賊急自救且圖牽制

上命諸將專力湖南十七年安親王復瀏陽復平江又招降僞水師將軍林興珠於湘潭而將軍穆占亦以陝西荊州精兵至拔永興茶陸攸縣酈縣安仁興寧郴州宜章臨武藍山嘉禾桂陽桂東十二城俱復

詔簡親王進守茶陵時三桂年六十有七矣失陝西閩粵三大

援至是又失江西大兵雲集湘湖間疆宇日蹙且軍興調發財用耗竭川湖賦稅不足供兵餉恐四方見輕情竭勢絀乃思竊帝號自娛其下亦爭勸進以衡州當兵衝自長沙徙都之築壇南嶽之麓以十七年三月朔郊天卽位改元昭武改衡州爲定天府置百官封諸將造新歷舉雲貴川湖鄉試號召遠近殿瓦不及易黃以漆聚之構蘆舍萬間爲朝房適大風雨潦草成禮而罷初十四年關陝之變四方騷動

上

欲親征駐荊州就近調度議政王大臣以京師根本重地車駕遠出恐有謬言奸究竊發固請止行至是

上慨諸軍曠日持久復下親

征之令王大臣復以賊勢日蹙無勞遠出爲請

上未決會賊召

回馬寶王緒胡國柱等悉銳偪永興永興爲衡州門戶相距僅百餘里賊所必爭我都統伊里布副都統哈克山相繼戰歿河外營壘爲賊據前鋒統領碩岱等入城死守賊三面環攻晝夜不息簡親王屯茶陵不敢救穆占在彬州遣兵來援亦不敢進城壞於砲囊土補之且築且戰凡二十日瀕危者數矣八月二十一日忽拔營去則三桂已死諸賊皆召赴衡州是月諸王奏

聞

上始罷親征之議初三桂舉兵諸

將或言宜疾行渡江全師北向或言直下金陵扼長淮絕南北運道或言宜出巴蜀據關中塞殺函自固三桂年老更事多欲出萬全不肯棄

滇黔根本初得湖南卽下令諸將毋得過江以爲事縱不成可畫長江而國故用兵數載未嘗長驅東北及大兵四合境蹙身死諸賊聚謀不知所出夏國貴復倡棄滇之議謂爲今日計有進死無退生宜舍湖南不顧北向以爭天下一陸軍出荆襄合蜀賊直趨河南一水軍下武昌掠舟艦順撼江左諸賊俱重棄滇馬寶首梗議蓋賊知是時南北俱已戒嚴大兵鼓行隨其前後縱冒死衝突無能爲也十月逆孫世璠自滇至衡始發喪僭號改元洪化迎喪還滇十八年正月大兵復岳州時貝勒尙善已歿以察尼赴岳統其軍而貝勒鄂鼐統舟師初岳州恃湖爲險賊糧皆取給於湘陰常德而我舟師僅營于君山賊舟來往自如冬令水涸我樓船不能入而賊小舟得出沒湖中至是水師烏船百艘沙船四百三十八艘皆造成共配兵三萬降將林興珠獻策請以其半泊

君山截常德之道以其半泊扁山香爐峽布袋口諸處并沿九貴山立陸營以斷長沙衡州之道冬令水涸則決新堤灌水通舟水陸綿亘百里賊援兵不敢進吳應麒使其黨駕巨艦二百乘風犯柳林我水師掉輕舟飛越賊船礮毀其半又敗其衆五千于陸石口餉運不繼我軍又縱反間離其黨吳應麒以疑殺數將于是僞總兵三人以舟師降城中賊潰圍走常德遂復岳州岳州旣復諸賊震恐勒爾錦亦率師自荊州渡江彝陵澧州之賊皆以舟師降常德長沙賊將皆棄城焚掠遁安親王由長沙進衡州吳國貴復國相等亦遁穆占追敗國貴于永州時湖南上游惟辰州之辰龍關與武岡之楓木嶺爲入黔要路皆天險吳國貴馬寶踞武岡胡國柱等踞辰州安親王至武岡攻賊於楓木嶺廣西巡撫傅宏烈由後路斷其餉道而大車奮擊其前礮殲吳國貴賊潰遁

遣彰泰追敗之遂復武岡貝勒察尼攻辰龍關徑狹箐密僅容一騎賊跨隘口立五營以拒官兵相持逾年始由間道襲破之遂克辰州沅州胡國柱走貴陽是爲湖南入黔滇之師是年吳世琮亦敗于廣西

命大將軍貝子賴塔由南寧進雲南連敗賊將何繼祖衆二萬於安籠所於黃草壩安籠所有石門坎天險賊奪於先聲忽一夕自相格殺疑我師劫營天明潰遁我師乘之擒馘無算是爲由粵入滇之師圖海孫思克皆密奏暫緩進漢中

上不許而提督趙良棟王進寶皆自任取蜀十八年十月亦兩路出師初漢中賊全仰四川兵餉自三桂死後賊謀日亂漢中餉援不繼於是進寶復鳳縣武關王屏藩力不支棄漢中走保寧我兵三路趨之十九年正月敗賊二萬于城外錦屏山奪橋而進王屏藩自縊死生擒吳之茂等乘勝復順慶而趙良棟由略

陽進克陽平關渡白水江復龍安浮渡明月江亦以是月克成都降其  
僞將軍以下文武百餘又敗胡國柱於建昌而圖海亦復興安將軍佛  
尼勒等復永寧復馬湖湖廣提督徐治都敗楊來嘉于巫山復夔州復  
重慶四川盡復會是秋降賊譚洪等復叛乃

詔王進寶留鎮四川

而趙良棟以勇略將軍兼雲貴總督統川師進檣是爲由蜀入滇之師  
十九年三月 詔安親王岳樂久勞於外殲克強寇令先率大兵之

半凱旋其蒙古寧古塔烏拉之兵全返

上親勞岳樂於蘆溝橋

如順治中勞信郡王之例以貝子彰泰代爲定遠平寇大將軍進取雲  
貴又以雲貴山地皆綠營步兵居前滿騎繼後特 命總督蔡毓榮

爲綏遠將軍節制漢兵先進時勒爾錦奉

命取重慶中道徑返荆

州上疏自劾

召回京師

詔曰當吳逆初叛時卽選滿漢精兵